

08 JUN 2002

Mahathir-Palestin (Fokus Berita)/I

DR MAHATHIR BAWA KEMPEN ANTI KEGANASAN KE VATICAN

Oleh: Mahrus Ibrahim

VATICAN CITY, 8 Jun (Bernama) -- Datuk Seri Dr Mahathir Mohamad tanpa mengenal penat lelah meneruskan usaha di pentas dunia untuk membantu menyelesaikan isu Palestin dan keganasan dengan usahanya itu kali ini membawa beliau ke Vatican City.

Lawatan beliau ke pusat utama agama Kristian itu, yang pertama bagi seorang ketua kerajaan Malaysia nampaknya banyak bertumpu kepada usaha menamatkan keganasan di Palestin.

Walaupun lawatan itu adalah atas undangan Pope John Paul II, Perdana Menteri menggunakan kesempatan itu untuk membangkitkan isu Palestin dalam pertemuan empat mata semalam bersama pemimpin mahzab katolik itu yang berusia 82 tahun.

Hal itu kemudian dibincangkan panjang lebar dalam pertemuannya dengan Setiausaha Negara, Kardinal Angelo Sodano dan para pegawai Vatican.

"Semasa saya bertemu dengan paus, saya meminta supaya keganasan di Palestin serta kekejaman Israel terhadap rakyatnya dihentikan segera," kata Dr Mahathir.

Ia merupakan rayuan yang beliau buat ke seluruh dunia, daripada White House dalam pertemuannya dengan Presiden George W. Bush, hinggalah ke Kremlin dalam pertemuan bersama Presiden Rusia Vladimir Putin, di Libya dalam perbincangannya dengan Kol. Muammar Gaddafi, dan di pelbagai forum antarabangsa di Malaysia.

Perspektif Dr Mahathir berhubung isu Palestini adalah jelas.

Menurut beliau, isu Palestin bukan semata-mata kerana Islam tetapi ia sebenarnya lebih kepada soal penduduk kehilangan tanah tumpah darah mereka kerana warga Palestin diusir daripada tanah mereka.

"Ia bukan semata-mata kerana agama, ia perjuangan untuk mendapatkan balik harta mereka," kata beliau.

Tetapi oleh kerana kebanyakan daripada rakyat Palestin beragama Islam, nasib malang yang menimpa mereka dan penderitaan mereka mendapat simpati rakan seagama dari seluruh dunia.

Vatican bersetuju dengan perspektif Dr Mahathir mengenai Palestin dan berkongsi pandangan dengan Malaysia yang punca keganasan perlu diatasi.

Pertemuan semalam juga bersetuju bahawa perlu ada campurtangan pihak ketiga di Palestin "untuk memisahkan mereka yang bertempur" dan juga bagi menamatkan keganasan di Palestin melalui rundingan.

Dr Mahathir berkata beliau berpuas hati yang lawatan ke Vatican telah membolehkan Malaysia menjelaskan pendirian negara mengenai hal itu.

Dalam tempoh lima hari akan datang beliau akan singgah di Switzerland dan Luxembourg.

Para pemerhati berkata isu-isu Asia Barat dan ancaman keganasan pasti timbul dalam perbincangan dengan pegawai-pegawai di situ.

Jelas sekali, tiada apa yang dapat menghalang Perdana Menteri dalam memperjuangkan keamanan dunia.

-- BERNAMA

MAI PR